

ZOMI BAPTIST CHURCH

Dallas-Fort Worth
Texas USA

Constitution and Bylaws

I. Ih Min – Our Name

Dallas-Fort Worth sunga om Zomite, biakna-pawlpi, pau leh ham, beh leh phung, khua leh tui, bangmah kidei danna omlo in, eima pau leh eima ngeina tawh Anungta **Pasian** biakhawm in, **Jesuh Khrih** sungah, **Kha Siangtho** hangin ih ki pumkhatna pawlpi min pen **Zomi Baptist Church (ZBC)** ahi hi.

II. Ei kuate - Who We Are

Ahi zongin note pen Pasian in a hong teelkhiat minam, Kumpi siampi pawl, a siangtho minam, Pasian' mite na hi uh a, khuamial sung panin a lamdang mahmah ama khuavak sungah a hong samkhiapa' nasepna a lamdangte a genkhia dingin Pasian in a hong teel mite na hi uh hi. Nidangin Pasian' mi na hihloh uh hangin tu-in ama mi na hi uh a, nidangin Pasian' hehpihna na theihloh uh hangin tu-in ama hehpihna na ngah uh hi (1 Peter 2:9-10).

Lai Siangtho sunga om mah bangin, ei pen DFW huam sunga om Pasian teelkhiat minam, kumpi siampi pawl, a siangtho minam, khuamial sung pan a lamdang mahmah ama khuavak sungah hong sap khiat, ama nasepna lamdangte a genkhia dinga aki pawlkhawm **Zomi Baptist Church, Dallas-Fort Worth, USA**, te ih hihi. Kumpi lam ah maangmuphiangsiah piak kul lo-in, biakna lam leh pilna lam ah ih khantoh theihna dingin aki pawlkhawm pawlpi ih hihi. Gam mihoih ahi dingin leh hong-uk kumpite thumang dingin a kipawl ih hihi. (Rom 13:1). Ahi zongin kumpi te in Pasian thu tawh a kituak lo thu, hong piak uh leh mihingte thu sangin, Pasian thu amang zaw dingte ih hi hi. (Sawltak 5:29).

III. Tup leh Ngim – Our Purpose

Na Topa Pasian na lungsim khempeuh, na nuntakna khempeuh, leh na pilna khempeuh tawh na it ding hi, cihna ahi hi. Hih pen a masapen, a lianpen thukham ahi hi. A nihna pen a masa mah tawh kibang a, nangma pumpi na it bangin na vengte na it in, cihna ahi hi (Matthai 22:37-39).

Tua ahih ciangin note pai un la, midang khempeuh, keima nungzui mi suaksakin, Pa min, Tapa min, leh Kha Siangtho min tawh tui sungah na phum un. Tua ciangin note tungah ka hong gen thute khempeuh a zuihna dingun na hilh un. Hun bei dongin note a hong ompih tawntung ding ka hihna thu phawk ta un, a ci hi (Mat 28:19-20).

Zomi Baptist Church pen Topa Jesuh min a thangsak ding leh ama hong gupkhatna thu a tangko dingin a ki pawl ih hihi. Tua te ih tangtun zawhna dingin tupna lian thum ih bul phuh hi.

Tua te in:

- a. **Lungdamna (Gospel) thu gen-in, Pasion phat ding**
- b. **Khat leh khat ki-it in, thupha ki bawl ding**
- c. **Gamsung, gampua, Pasion na (Mission) sem ding**

Tua ahih man in Pawlpi min tawh ihsep ihbawl khempeuh hih teng thum tawh a ki tuah kul hi. Na khat peuhpeuh ih sep ciangin hih hangin Pasion min a kiphat diam, khat leh khat ki itna hong khang sak diam, mite adingin phattuumna thupha a bawl diam cih enkawm asem dingte ih hihi.

IV. Up leh Zuih – What We Believe

1. Lai Siangtho – About the Holy Bible

Lai Siangtho pen Pasion hu-mop, khialhna a omlo, Piansil pan Maangmuhna dongin athu man Pasion kammal hi ci-in ih um hi. (Late 19:7-11; 119:89,105,130,160; Paunak 30:5-6; Isaiah 8:20; Luka 16:31; 24:25-27,44-45; Johan 5:39,45-47; 12:48; 17:17; Sawltak 1:16; 28:25; Rom 3:4; 15:4; Efesa 6:17; Timoti Nihna 3:16-17; Peter Masa 1:23; Peter Nihna 1:19-21; Maangmuhna 22:19)

2. Pasion – About the True God

Van leh lei a bawl nakhempeuh a piangsak, a siangtho, a nungta tawntung Pasion; Pa, Tapa, Khai Siangtho thumgawm Pasion khat bek ih um hi. (Piansil 17:1; Paikhiatna 20:2-3; 15:11; Late 83:18; 90:2; 147:5; Jeremiah 10:10; Matthai 28:19; Marka 12:30; Johan 4:24; 10:30; 15:26; 17:5; Sawltak 5:3-4; Rom 11:23; Korin Masa 12:10-11; 8:6; 12:4-6; Korin Nihna 13:14; Efesa 2:18; 4:6; Filippi 2:5-6; Timoti Masa 1:17; Johan Masa 5:7; Maangmuhna 4:11)

3. Jesuh Khrih – About Jesus Christ

Jesuh pen a nungta Pasion tapa, nungak siangtho sung pan a suak, mawhna a neilo, mihingte mawh pan hong tan khia ding a hong pai, thumgawm Pasion sungpan Tapa ahi, Topa leh Honpa Jesuh Khrih hi ci in ih um hi. (Piansil 3:15; Late 2:7; Isaiah 7:14; Matthai 1:18-25; Marka 1:1; Luka 1:35; Johan 1:14; Galati 4:4; Korin Masa 15:47; Johan Masa 5:20)

4. Kha Siangtho – About the Holy Spirit

Khai Siangtho pen thu um mi khempeuh te tungah hong ki pia, ih mawhna hong ki telsak, thuman lampi ah hong kha, ei te tawh a hong om khawm tawntung, thumgawm Pasion sungpan khat hi ci in ih um hi. (Piansil 1:13; Matthai 3:11; 28:19; Marka 1:8; Luka 1:35; 3:16; 24:49; Johan 1:33; 3:5-6; 14:16-17,26; 15:26-27; 16:8-11,13; Sawltak 5:30-32; 11:16; Rom 8:14,16; Efesa 1:13-14; Thes Nihna 2:7,13)

5. Pawlpi – About the Church

Pawlpi pen Pasion um in, Jesuh Khrih gumpa leh honpa in sangin Pa mintawh, Tapa mintawh, leh Khai Siangtho mintawh tuisungah a kiphum mi te kipawl na hi in, mihing te khut tawh a ki lam innte hi lo hi ci in ih um hi. (Siampi Laibu 27:31; Malakhi 3:10; Matthai 28:19-20; Sawltak 2:41-42; 6:5-6; 14:23; 15:22-23; 20:17-28; Korin Masa 5:11-13; 6:1-3; 11:2; 12:4,8-11; 16:1-2; Efesa 1:22-23; 4:11; 5:23-24; Kolose 1:18; Timoti Masa 3:1-13)

6. Ki Tuiphumna leh Nekkhop Nekna – About Baptism and the Lord's Supper

A um mi te Pa min, Tapa min, leh Khansiangtho min tawh ki thuiphumna leh Topa Jesuh hong thupiak, Kei nong phawkna un na zang un hong cih Nekkhwam nekna ih zui hi. (Matthai 3:6; 3:16; 28:19-20; Johan 3:23; Sawltak 2:41-42; 8:36-39; Rom 6:3-5; Korin Masa 11:23-28; Kolose 2:12)

7. Mission Sepna – About Missions

Lungdamna thu tangko na leh Gammial nasep ahi “mission nasep” pen Lai Siangtho in teltak in hong sawl hi ci-in ih um hi. (Matthai 28:18-20; Marka 16:15; Johan 20:21; Sawltak 1:8; Rom 10:13-15)

8. Piak Khatna – About Tithes and Offerings

Pasion hong piak thupha sungpan sawm ah khat ahi a, lungdamkoh biak piakna ahi a, upna kamciam piak khatna a hi zong Topa gam leh ama nasepna a ding in piakkhatna pen zuih a kul Pasion thupiak hi ci-in ih um hi. (Korin Nihna 8:7; 9:6-8; Korin Masa 16:2; Hebru 7:2,4; Matthai 23:23; Siampi Laibu 27:30; Malakhi 3:10; Sawltak 4:35, 37)

9. Ki Tenna – About Marriage

Ki tenna pen Lai Siangtho sunga om mah bang in numei khat leh pasal khat ki tenna bek mah ih zui hi. (Piancil 2:24; 19 Gen. 2:24; Rom. 7:2; 1 Cor. 7:10; Eph. 5:22-23 Hebru 13:4)

10. Ki maakna – About Divorce

Nupa pen atawntungin ki tul-pih dingin Pasion thupiak hi ci-in ih um hi. Khat leh khat tungah (angkawm-na tawh) ki thuman zawhlohna leh khut-tum leh zum-le-hiam tawh ahizong ki-bet, ki-sat, ki-vuak, ki-simmawh, ki-bawlsiatna te thuakzawh nawn lohna hang cih loh sihna lo buangin nupa kikhen saklo ding cih Lai Siangtho deihna hi ci in ih um hi. (Piancil 2:24; Malakhi 2:14-17; Matthai 19:3-12; Rom 7:1-3; Korin Masa 7:12-16)

V. Pawlpi Kivaipuak Zia – Organizational Structure

Na khempeuh khat beek a om ma-in amah om khinta a, amah tawh a kipawl manin na khempeuh ama mun sansanah hoihtakin a omthei hi. Na khempeuhah amah a lianpen ahih theihna dingin, amah pen pawlpi ahi ama pumpi lutang hi a, pawlpi' nuntakna a kipatna hi a, sihna panin a kithosak kik Tapa cil ahi hi (Kolose 1:17, 18).

Pawlpi lutang in Khrih hi masa pen a, a zom ah pastor /sia-te hi pan hi. Jesuh Khrih makaihna nuai ah mipi-te, upa-te leh Pastor/Sia-te, ki thutuak in, na khempeuh a hoihpen ding in semkhawm ding hi.

VI. Pawlpi Sia – Pastor

Pastor/sia khat pen zu, za, khamtheih, guihtheih a kipan azang lo, mite lak ah a paubanglo mi a hih kul hi.

Mi khatpeuh, pawlpi sia nasep a ut leh a hoih mahmah ahi hi, a cihna thu a man ahi hi. Tua ahih manin siate pen paubaan'na a neilo mi, zi khat bek a nei mi, lungsim hoih hithiat mi, thu a ngaihsun thei mi, a kilawm a kituakin a gamta mi, zin leh leengla do a siam mi, thuhilh a siam mi, zu a khamlo mi, a ngongtatlo mi, lungsimnem mi, kitot a uklo mi, sum a deihlualo mite hi ding uh hi. A innkuan sung hoihtakin a ukzo mi, a tate thumangsak thei-in, na khempeuhah a kilawm a kituakin a gamtasak thei mi hi ding uh hi. Bang hang hiam cih leh mi khatpeuh in a innkuan sung ukzia ding a theih kei leh Pasian' pawlpi kem theilo ding hi. Khristian a suaktungte zong hilo ding hi. Tua bang mi thakte kiphasak thei a, Dawimangpa mah bangin thukhenna a thuk mite hikha thei ding hi. Pawlpi mi a hilo midangte in zong a zahtak mite hi ding hi. Tua hi leh mindai khalo ding a, Dawimangpa' thangah awk khalo zawdeuh ding hi (Timoti Masa 3:1-7).

1. Nasep/Vaipuak – Duties of the Pastor

- a. Pastor/sia pa pen Zomi Baptist Church ki pawlna a ding in lutangpi (Chairman) leh khalam ah pawlpi mite a ding in tuucing pa hi'n, biakpiak, kikhopna te leh pawlpi vaihawmna (administration) te ah thu vai hawm ding hi. Pasian tuucing khat ahih mah bang in itna leh zahtakna kilak dinga, amah zong Pasian thu sungah citak tak in na hong sem ding hi.
- b. Pulpit tunga thugen dingte leh zin leh lengna hun zang dingte siapa in sam dinga, a pualam pan sia leh lengna hong pai nuam a om ciangin pawlpi kem pastor tawh ki kumkhawm masa in, hun leh vai alem bangin, a hoihpen in ki vaihawm ding hi. Pawlpi tawh kisai meeting khempeuh ah official member hi dinga, mi dang seh kholhsa a neih loh buang in pawlpi tawh kisai meeting khempeuh ah moderator sem ding hi.
- c. Pawlpi zum nasep (staff and employees) cialna ahi a, khawlsakna ahizong in pastor in hoih a sak bang hi ding hi. Pawlpi mite leh up ate in thungetna tawh leh thu hoih tawh panpih ding hi. Pawlpi budget gelna te a om khit ciangin, sumzat zia te pastor leh akiseh te in hong van ding hi. Pastor in Pasian na sepna ding in a kism bang in Pawlpi phat tuam nading sumzekna leh ministry team cih bang bawlpa te hong nei thei ding hi.

2. Sia Cialna – Calling a Pastor

Pastor neih nawnloh a, cial thak a hong kul ciang in Pawlpi upa nih leh upa semlo mi nih, a ki gawm in mi 4 in pastor ding zong ding uh a, pastor khat peuhpeuh a ki cial ma in mipi vote tawh kiteelna om dingin pawlpi mi member 75% (mi 100 ah 75) in vote piakte bek in Zomi Baptist Church ah pastor semthei ding hi. Khat vei kiteel in mi/candidate khat bek vote tawh kiteel dinga, hi tenih lak ah khat, ahiah kei leh hiteng lak ah khat cih om thei lo ding hi.

3. Sia Tawpsak na – Dismissal of the Pastor

Pastor pen a hun ciangtan om lo in ki cial dinga, amah a khawlnop ciangin ni 30 ma in khawlina lai pia khol ding hi. Thusia, lasia, nulehpa lam ah khialhna leh upadi tawh kisai mawhna thu a neih leh pawlpi upa ten pastor pa khawlsak thei ding hi. Pawlpimi te leh pastor a kithuah khop theih nawn kei leh hun ki magen khol pawlpi member meeting ah member 75% vote tawh pastor ki khawlsak ding hi. Tua bang thu ah ni 90 dong khasum (compensation) kipia lai ding hi.

VII. Pawlpi Upate – Deacons - Servant Leaders

“Note lakah a lianpenpa, na nasem uh hi ding hi.” Matthai 23:11

Zomi Baptist Church sungah upa te pen nasem makai te a hi uh hi. Topa Jesuh mahmah zong mite na asem sak ding hong pai lo-in mite na asem ding in hong pai ahiah na ih zui hi. Upa te din mun leh sepding te pen anuai Lai Siangtho mun ki bulphuh hi:

Pawlpi upa dingte zong a gamtat hoih, a lungsim citak, leenggahzu tam a nelu, sum thu-ah a huaiham mi hilo ding uh hi. Lungsim kisuan'na a omlo, upna thu-ah a kip mite hi ding uh hi. A masa-in kize-et phot ding a, paubaan'na a om kei leh sem thei pan ding uh hi. A zite uh zong a gamtat hoih mi hi-in, mi gensiat a hatlote hi ding uh a, lungsim citak, thu khempeuhah a thuman mi hi ding uh hi. Upate pen zi khat bek a nei mi, a tate leh a innkuansung hoihtakin a ukzote hi ding hi. Pawlpi upa hoihtakin a semthei mite pen mite in zahtak uh a, Khrih Jesuh a upna thu uh kisuan'na om hetloin hangtakin gen ngam uh hi (Timoti Masa 3:8-13).

1. Upa Kiteel Na

Pawlpi upa ding pen pastor leh pawlpi mite in kumcin meeting teh mipite tawh kipsak ding uh hi.

2. Terms

Kum khat, kum nih, kum thum, kum li

3. Upa Bangzah

Pastor leh pawlpi te'n a hoih pen dingin a gel zah uh hi ding hi.

4. Nasep

Upa te nasep pen 'nasem,' (servant) lungsim pua in sem ding hi. Pastor pa ahuh ding leh pawlpi mite thungetsak na, inn ah natvehna, zato an natvehna, pawlpi a ding a kisamte ah a huh ding in a ki pia ahi uh hi.

VIII. Thusai Dinga Mimuan Kisehte - Trustees

Pawlpi tawh kisai, neihsa vai a hi zong, leitung upadi vai a hizong, thu leh la ah pastor a panpih a vai hawmpih dingin mi muanhuai thusai kiese dinga, pawlpi upate bangin Pasion thu leh khalam ah zong mi muan huai mi hi ding uh hi. Kiteel zia leh terms te pen pawlpi upa pai zia mah tawh ki bang ding hi.

IX. Sumkem - Treasurer

Sumkem ding pen mi citak, mi muanhuai mahmah, sum leh pai lamah apau banglo ahih kul hi. A hunzui in pastor leh pawlpi upa te in teel dinga, a term ding zong pastor leh upaten vai hawm khawm in, kum sim in audit ki bawl ding hi. Auditor semdingte a hunzui in kiese dinga, mi 2 peuhmah hi ding hi.

X. Sumpi Lai-at - Finance Secretary

Sumpi-sim leh lai-at kiese ding a, Pawlpi upa sung pan zong hi thei, upa ahi lo pawlpi mi hoih mi muan huai khat peuh zong hi thei hi. Sumpi hong simsak khit uh ciangin sumpi ciapteha laibu bu nih tawh ciamteh dinga, bu khat sumkempa kiangah om ding a, a bukhat pen biakinn office ah om ding hi.

XI. Lai-at - Secretary

Pawlpi lai at pen in meeting mattaan khempeuh hong ciapteh sak dinga, pawlpi mattaan leh pawlpi thukhunte, church office sungah kepcingna ahi zong sem ding hi.

XII. Pawlpi Sung Makaite – General Leadership

Pawlpi upa leh makai mi khat pen piak khatna zong man in, a ki niamkhiat, Pasion zah tak, mite tungah itna leh hehpihna a nei mi hi ding hi.

“Eite khempeuh pumkhat bek hi-in Kha Siangtho zong khat bek mah a neikhawm ihi hi.”
Efe 4:4

Pawlpi sungah ih ki thutuaka, ih kipum khat theihna dingin pawlpi sungah makai, nasem, pan mun nei khempeuh in anuai a Laisingtho munte ih bulphuh hi.

Tua ahih manin kei tawh ngaihsutna kibangin note khatlekhat ki-itin, khatlekhat lungsim kituakin na omna uh tawh keima lungdamna na hong cingtaaksakna dingun ka hong kun hi. Huaihamna lungsim leh kisialh nopna lungsim tawh bangmah gamta kei un. Kiniamkhiat ciat un la, midangte thupi ngaihsutzaw un. Note' phattuumna ding bek ngaihsun kei un la, midangte' phattuumna ding

ngaihsutsak zaw un. Note in Jesuh Khrih lungsim puakzia na nei un. Tua lungsim puak zia in: Jesuh Khrih in Pasion' pianzia nei napi-in, Pasion tawh a kizakim theihna dingin thathanghat thu a suang kei hi. Amah kiniamkhiat tawm zaw a, nasem lim a hong puazaw hi. Mihing bangin amah hong kibawl a, mihing teekteek mah a hong sun hi. Amah hong kiniamkhiat tawm a, singlamteh tung nangawnah sihding a ut hi (Filippi 2:2-8).

Pawlpi makai te in mi gensiat pel in, phunphun lo, luilui lo, mi sutuah, holhtuah lo ding hi. Tua te pel bek lo-in tua bang a gamta te thuhilh in khawlsak ding hi. Pasion a zahtak takpi makai te pen tua bangin a omkhak leh amah leh amah upa sepna pan in khawl ding hi. Tua ahih man in pawlpi upa, makai khat in Lai Siangtho sunga om mah bangin mite et tehhuai mi hi dinga, Pasion minthan nading, pawlpi khantoh na ding leh lungdam na thu a kizelhna dingin ahih theihzah in amapang mi hi ding hi.

XIII. Pawlpua Lamtawh Kisai Makai te – Leadership for Outside Purposes

Pawlpuu lam tawh ki sai kumpi thu ahi a, upadi lam thu ahi zong Zomi Baptist Church tang in ading dingin pastor leh trustees (Thusai dingin minmuan kiseh-te) tungah ki ap hi.

XIV. Pawlpi Mi - Membership

Pawlpi mite pen Jesuh sungah pum khat ih hi hi.

“Pumpi pen khat bek hinapi-in na a tuamtuam a nei hi. Pumpi in na a tuamtuam tampi a neih hangin pumpi khat bek mah ahih veve mah bangin Khrih zong pumpi na a tuamtuam a nei pumpi khat ahi hi,” (Korin Masa 12:12).

Jesuh in Topa hi ci'n, Khrih Gumpa leh Honpa in asan-na kilangh in, membership hong late pawlpi mi (member) in ki sang ding hi.

Jesuh pen Topa hi, ci-in mite kiangah genin, Pasion in sihna panin amah hingkiksak zo hi, ci-in na lungsim sung uhah na up taktak uh leh hotkhiatna na ngah ding uh hi. Bang hang hiam cih leh i lungsimah i up taktakna hangin Pasion tawh kipawl theihna kingah a, i kamin i genna hangin hotkhiatna a kingah ahi hi. Lai Siangtho in, “Amah a um mi peuhmah tavailo ding hi,” ci hi. Bang hang hiam cih leh Jew mi leh Gentail mi a kideidanna omlo ahih manin Topa pen mi khempeuh' Topa hi kim a, ama kiangah a ngen khempeuh tungah thupha tampi tak a pia hi. Lai Siangtho in zong, “Topa tungah huhna a ngen khempeuhte in hotkhiatna a ngah ding uh hi,” ci hi (Rom 10:9-13).

XV. Pawlpi Mite Tungah Lam-et Na (Korin Masa 12:27) - Expectations

1. Ki pumkhatna (Efe 4:3, Paunak 6:19, Korin Masa 10:10)
2. Pawlpi sungah sep khopna: Pawlpi sungah septheihna mun ki nei ciat a,, tua munte ah ki pia khia (volunteer) in sem dingin pawlpi mimal khatciat tungah lam etna ki nei hi. (Korin Masa 12).

3. Piak khatna: Pawlpi mimal kim in Pasion gam leh pawlpi sungah nasepna dingin (sawm-a-khat ahi a, ciitpiakna tawh ahizong) piak khatna tawh mapang khawmciat ding in ki lam en hi. (Korin Nihna 9).
4. Pawlpi sung thu: Pawlpi sung buaina ahizong, khat leh khat ki lungkim lohna ahizong, thukhat peuhpeuh a om leh anuai a Lai Siangtho munte zui in ki kalsuan ding hi:

Na sanggamte uh na tung uhah hong khialh leh pai-in note gel bek theihin a khialhna va gen un. Na thu uh a hong man' leh na sanggampa uh a ngahkik na hi uh hi. Ahi zongin na thu uh a hong man'nop kei leh, Lai Siangtho sungah, 'Mi nih ahih kei leh mi thum' theihna bek tawh mawhsakna khat peuhpeuh man pan hi,' a cih mah bangin midang khat ahi a, nih ahi zongin tonpih un. Amah in tua mite' thu a man'nop kei leh pawlpite tungah a thu ko un. Pawlpite' thu nangawn a man'nop kei leh Gentail mite leh siahdongte bangin na ngaihsun un," (Matthai 18:15-17).

XVI. Pawlpi Thuciamna - Membership Covenant

Zomi Baptist Church member khat ka hihna tawh Pasion leh pawlpi it in pawlpi thukhun ka zui ding hi.

XVII. Amau Ngaihsut Bangbanga Thukhen Theihna - Arbitration

Thu haksa pawlsung thu, upadi lam tawh ki sai zah ciangdong dingin thu khat peuhpeuh hong om leh Lai Siangtho sunga om bang in pastor leh pawlpi upate khensat bangbang kimang ding hi.

"I can do all things through Christ who strengthens me." Philippians 4:13

Note khatlekhat thu na kineih uh ciangin Pasion' mi siangthote khensakzaw loin lawki thukhente' mai na kitun' ngam uh hi. Pasion' mite in leitung mite' thu a khensakzaw ding ahihlam theilo na hi uh hiam? Note pen leitung mite' thu a khensak ding na hih uh ciangin tua bang thu neute khen theilo lawmlawm na hi uh hiam? Eite pen vantung mite' thu nangawn a khensak ding ihih lamtak theilo na hi uh hiam? Tua ahih manin hih leitunga no' thu neuneute leltak na khentheih zawk kan ding uh ahi hi. Tua bang hinapi-in hih bang thu themthem hong pian' ciangin pawlpi sungah bangmahin a kisimlo mite' mai kitun'ding na hi uh hiam? Note-a' dingin zumhuai mahmah hi. Note khatlekhat na kithu-neihnate uh a khentheih ding note lakah mipil khat beek om buang ding hi. Tua hinapi, khatlekhat thu kineihin zum na kitun' uh a, lawki thukhente na khensak tazen uh hi. Note khatlekhat zum na kitut mahmah uh zong a gina hetlo na hihna uh hong kilangsak hi. Bang hangin thuakzaw mailo a, sum ngamzaw mailo na hi uh hiam? (Korin Masa 6:1-7).

XVIII. Pawlpi Mi Sihna leh Vuina – Death and Burial

ZBC pawl lutkhin, DFW huam sungah omlai in, pawldangah lutna a neilo (active member) pawlpi mikhat a sih ciangin, Pawlpi in sigal-na dollar tulkhat (\$1000.00) pia-in, tutpiah hun bawlina, sihvui-na leh lei-ah phum-na te hoiah tak bawlsak ding hi.

XIX. Pawl Beina – Dissolution

Deih loh pen in pawl beina ih neih leh leibat teng loh in, van neih teng zuak in sum om lai khem peuh Zomi Baptist Church upna tawh a ki bang upna nei Pasion na sepna ding in ki pia dinga, mi mal kua mah in pawlpi sum leh van mal khat zong ngah lo ding hi.

XX. Puahphatna – Amendment

Constitution and Bylaws kipsak zawh kumkhat khith ciang mipi 2/3thukim natawh ki puahpha thei ding hi.

Committee Members:

<u>Name</u>	<u>Signature</u>	<u>Date</u>
-------------	------------------	-------------

<u>Rev. Pau Za Khup</u>	_____	_____
-------------------------	-------	-------

<u>Pa Zam Khat Langh</u>	_____	_____
--------------------------	-------	-------

<u>Pa Khual Lam Mang</u>	_____	_____
--------------------------	-------	-------

<u>Pa Nang Sian Siam</u>	_____	_____
--------------------------	-------	-------

Bylaws and Consitution et kikna – Date: March 03, 2016

Enkik teng:

Rev. Pau Za Khup

Pa Do Suan Lian

Pa Khup Thawn Khai

